

後漢書

二



後漢書卷八

孝靈帝紀第八

孝靈皇帝諱宏，肅宗玄孫也。曾祖河間孝王開，祖淑，父萇。世封解瀆亭侯，帝襲侯爵。母董夫人。桓帝崩，無子，皇太后與父城門校尉竇武定策禁中，使守光祿大夫劉儵持節，將左右羽林至河間奉迎。

建寧元年春正月壬午，城門校尉竇武爲大將軍。己亥，帝到夏門亭，使竇武持節，以王青蓋車迎入殿中。庚子，即皇帝位，年十二。改元建寧。以前太尉陳蕃爲太傅，與竇武及司徒胡廣參錄尚書事。使護羌校尉段熲討先零羌。

二月辛酉，葬孝桓皇帝于宣陵，廟曰威宗。庚午，謁高廟。辛未，謁世祖廟。大赦天下，賜民爵及帛各有差。段熲大破先零羌於逢義山。

閏月甲午，追尊皇祖爲孝元皇，夫人夏氏爲孝元皇后，考爲孝仁皇，夫人董氏爲慎園貴人。

夏四月戊辰，太尉周景薨。司空宣酆免，長樂衛尉王暢爲司空。

五月丁未朔，日有食之。詔公、卿以下各上封事，及郡國守、相舉有道之士各一人；又故刺史、二千石清高有遺惠爲衆所歸者，皆詣公車。太中大夫劉矩爲太尉。

六月，京師雨水。

秋七月，破羌將軍段熲復破先零羌於涇陽。

八月，司空王暢免，宗正劉寵爲司空。

九月（丁）〔辛〕亥，中常侍曹節矯詔誅太傅陳蕃、大將軍竇武及尚書令尹勳、侍中劉瑜、屯騎校尉馮述，皆夷其族。皇太后遷于南宮。司徒胡廣爲太傅，錄尚書事，司空劉寵爲司徒，大鴻臚許栩爲司空。

冬十月甲辰晦，日有食之。令天下繫囚罪未決人贖，各有差。

十一月，太尉劉矩免，太僕沛國聞人襲爲太尉。

十二月，鮮卑及濊貊寇幽、并二州。

二年春正月丁丑，大赦天下。

三月乙巳，尊慎園董貴人爲孝仁皇后。

夏四月癸巳，大風，雨雹。詔公、卿以下各上封事。

五月，太尉聞人襲罷，司空許栩免。

六月，司徒劉寵爲太尉，太常許訓爲司徒，太僕長沙劉囂爲司空。

秋七月，破羌將軍段熲大破先零羌於射虎塞外谷，東羌悉平。

九月，江夏蠻叛，州郡討平之。丹陽山越賊圍太守陳寅，寅擊破之。

冬十月丁亥，中常侍侯覽諷有司奏前司空虞放、太僕杜密、長樂少府李膺、司隸校尉朱（瑀）〔寓〕、潁川太守巴肅、沛相荀（翌）〔昱〕、河內太守魏朗、山陽太守翟超皆爲鉤黨，下獄，死者百餘人，妻子徙邊，諸附從者錮及五屬。制詔州郡大舉鉤黨，於是天下豪桀及儒學行義者，一切結爲黨人。（庚子）〔戊戌〕晦，日有食之。

十一月，太尉劉寵免，太僕郭禧爲太尉。鮮卑寇并州。

是歲，長樂太僕曹節爲車騎將軍，百餘日罷。

三年春正月，河內人婦食夫，河南人夫食婦。

三月丙寅晦，日有食之。

夏四月，太尉郭禧罷，太中大夫閻人襲爲太尉。

秋七月，司空劉囂罷。

八月，大鴻臚橋玄爲司空。

九月，執金吾董寵下獄死。

冬，濟南賊起，攻東平陵。鬱林烏潯民相率內屬。

四年春正月甲子，帝加元服，大赦天下。賜公、卿以下各有差，唯黨人不赦。

二月癸卯，地震，海水溢，河水清。

三月辛酉朔，日有食之。太尉聞人襲免，太僕李咸爲太尉。詔公、卿至六百石各上封事。大疫，使中謁者巡行致醫藥。司徒許訓免，司空橋玄爲司徒。

夏四月，太常來豔爲司空。

五月，河東地裂，雨雹，山水暴出。

秋七月，司空來豔免。癸丑，立貴人宋氏爲皇后。司徒橋玄免，太常宗俱爲司空，前司空許栩爲司徒。

冬，鮮卑寇并州。

熹平元年春三月壬戌，太傅胡廣薨。

夏五月己巳，大赦天下，改元熹平。長樂太僕侯覽有罪，自殺。

六月，京師雨水。癸巳，皇太后竇氏崩。

秋七月甲寅，葬桓思皇后。宦官諷司隸校尉段熲捕繫太學諸生千餘人。

冬十月，渤海王惲被誣謀反。丁亥，惲及妻子皆自殺。

十一月，會稽人許生自稱『越王』，寇郡縣，遣楊州刺史臧旻、丹陽太守陳夤討破之。

十二月，司徒許栩罷，大鴻臚袁隗爲司徒。鮮卑寇并州。

是歲，甘陵王恢薨。

二年春正月，大疫，使使者巡行致醫藥。丁丑，司空宗俱薨。

二月壬午，大赦天下。以光祿勳楊賜爲司空。

三月，太尉李咸免。

夏五月，以司隸校尉段熲爲太尉。沛相師遷坐誣罔國王，下獄死。

六月，北海地震。東萊、北海海水溢。

秋七月，司空楊賜免，太常潁川唐珍爲司空。

冬十二月，日南徼外國重譯貢獻。太尉段熲罷。鮮卑寇幽、并二州。癸酉晦，日有食之。

三年春正月，夫餘國遣使貢獻。

二月己巳，大赦天下。太常陳耽爲太尉。

三月，中山王暢薨，無子，國除。

夏六月，封河閒王利子康爲濟南王，奉孝仁皇祀。

秋，洛水溢。

冬十月癸丑，令天下繫囚罪未決入縑贖。

十一月，楊州刺史臧旻率丹陽太守陳（寅）（夤）大破許生於會稽，斬之。任城王博薨。

十二月，鮮卑寇北地，北地太守夏育追擊破之。鮮卑又寇并州。司空唐珍罷，永樂少府許訓

爲司空。

四年春三月，詔諸儒正《五經》文字，刻石立于太學門外。封河閒王建（孫）（子）佗爲任城

王。

夏四月，郡國七大水。

五月丁卯，大赦天下。延陵園災，遣使者持節告祠延陵。鮮卑寇幽州。

六月，弘農、三輔螟。遣守官令之鹽監，穿渠爲民興利。令郡國遇災者，減田租之半；其傷害十四以上，勿收責。

冬十月丁巳，令天下繫囚罪未決人繚贖。拜冲帝母虞美人爲憲園貴人，質帝母陳夫人爲渤海孝王妃。改平準爲中準，使宦者爲令，列於內署。自是諸署悉以閹人爲丞、令。

五年夏四月癸亥，大赦天下。益州郡夷叛，太守李顥討平之。復崇高山名爲嵩高山。大雩。使侍御史行詔獄亭部，理冤枉，原輕繫，休囚徒。

五月，太尉陳耽罷，司空許訓爲太尉。

閏月，永昌太守曹鸞坐訟黨人，弃市。詔黨人門生故吏父兄子弟在位者，皆免官禁錮。六月壬戌，太常南陽劉逸爲司空。

秋七月，太尉許訓罷，光祿勳劉寬爲太尉。

冬十月壬午，御殿後槐樹自拔倒豎。司徒袁隗罷。

十一月丙戌，光祿大夫楊賜爲司徒。

十二月，甘陵王定薨。試太學生年六十以上百餘人，除郎中、太子舍人至王家郎、郡國文學吏。

是歲，鮮卑寇幽州。沛國言黃龍見譙。

六年春正月辛丑，大赦天下。

二月，南宮平城門及武庫東垣屋自壞。

夏四月，大旱，七州蝗。鮮卑寇三邊。市賈民爲宣陵孝子者數十人，皆除太子舍人。

秋七月，司空劉逸免，衛尉陳球爲司空。

八月，遣破鮮卑中郎將田晏出雲中，使匈奴中郎將臧旻與南單于出鴈門，護烏桓校尉夏育出高柳，並伐鮮卑，晏等大敗。

冬十月癸丑朔，日有食之。太尉劉寬免。帝臨辟雍。辛丑，京師地震。辛亥，令天下繫囚罪未決人繚贖。

十一月，司空陳球免。

十二月甲寅，太常河南孟馘爲太尉。庚辰，司徒楊賜免。太常陳耽爲司空。鮮卑寇遼西。永安太僕王昱下獄死。

光和元年春正月，合浦、交趾烏滸蠻叛，招引九真、日南民攻沒郡縣。太尉孟馘罷。

二月辛亥朔，日有食之。癸丑，光祿勳陳國袁滂爲司徒。己未，地震。始置鴻都門學生。

三月辛丑，大赦天下，改元光和。太常常山張顥爲太尉。

夏四月丙辰，地震。侍中寺雌雞化爲雄。司空陳耽免，太常來豔爲司空。

五月壬午，有白衣人入德陽殿門，亡去不獲。

六月丁丑，有黑氣墮所御溫德殿庭中。

秋七月壬子，青虹見御坐玉堂後殿庭中。

八月，有星孛于天市。

九月，太尉張顥罷，太常陳球爲太尉。司空來豔薨。

冬十月，屯騎校尉袁逢爲司空。皇后宋氏廢，后父執金吾鄴下獄死。丙子晦，日有食之。

十一月，太尉陳球免。

十二月丁巳，光祿大夫橋玄爲太尉。

是歲，鮮卑寇酒泉。京師馬生人。初開西邸賣官，自關內侯、虎賁、羽林，人錢各有差。私令左右賣公、卿，公千萬，卿五百萬。

二年春，大疫，使常侍、中謁者巡行致醫藥。

三月，司徒袁滂免，大鴻臚劉郃爲司徒。乙丑，太尉橋玄罷，太中大夫段熲爲太尉。京兆地震。司空袁逢罷，太常張濟爲司空。

夏四月甲戌朔，日有食之。辛巳，中常侍王甫及太尉段熲並下獄死。丁酉，大赦天下，諸黨人禁錮小功以下皆除之。東平王端薨。

五月，衛尉劉寬爲太尉。

秋七月，使匈奴中郎將張脩有罪，下獄死。

冬十月甲申，司徒劉郃、永樂少府陳球、衛尉陽球、步兵校尉劉納謀誅宦者，事泄，皆下獄死。

巴郡板楯蠻叛，遣御史中丞蕭瑗督益州刺史討之，不剋。

十二月，光祿勳楊賜爲司徒。鮮卑寇幽、并二州。
是歲，河間王利薨。洛陽女子生兒，兩頭四臂。

三年春正月癸酉，大赦天下。

二月，公府駐駕廡自壞。

三月，梁王元薨。

夏四月，江夏蠻叛。

六月，詔公、卿舉能通《尚書》、《毛詩》、《左氏》、《穀梁春秋》各一人，悉除議郎。
秋，表是地震，涌水出。

八月，令繫囚罪未決入繚贖，各有差。

冬閏月，有星孛于狼、弧。鮮卑寇幽、并二州。

十二月己巳，立貴人何氏爲皇后。

是歲，作罽眭、靈昆苑。

四年春正月，初置駟驥廐丞，領受郡國調馬。豪右辜摧，馬一匹至二百萬。

二月，郡國上芝英草。

夏四月庚子，大赦天下。交趾刺史朱儁討交趾，合浦烏滸蠻，破之。

六月庚辰，雨雹。

秋七月，河南言鳳皇見新城，羣鳥隨之。賜新城令及三老、力田帛各有差。

九月庚寅朔，日有食之。太尉劉寬免，衛尉許馡爲太尉。

閏月辛酉，北宮東掖庭永巷署災。司徒楊賜罷。

冬十月，太常陳耽爲司徒。鮮卑寇幽、并二州。

是歲，帝作列肆於後宮，使諸采女販賣，更相盜竊爭鬪。帝著商估服，飲宴爲樂。又於西園弄狗，著進賢冠，帶綬。又駕四驢，帝躬自操轡，驅馳周旋。京師轉相放效。

五年春正月辛未，大赦天下。

二月，大疫。

三月，司徒陳耽免。

夏四月，旱。太常袁隗爲司徒。

五月庚申，永樂宮署災。

秋七月，有星孛于太微。巴郡板楯蠻詣太守曹謙降。癸酉，令繫囚罪未決入縲贖。

八月，起四百尺觀於阿亭道。

冬十月，太尉許馗罷，太常楊賜爲太尉。校獵上林苑，歷函谷關，遂巡狩于廣成苑。

十二月，還，幸太學。

六年春正月，日南徼外國重譯貢獻。

二月，復長陵縣，比豐、沛。

三月辛未，大赦天下。

夏，大旱。

秋，金城河水溢。五原山岸崩。始置圃園署，以宦者爲令。

冬，東海、東萊、琅邪井中冰厚尺餘。

大有年。

中平元年春二月，鉅鹿人張角自稱『黃天』，其部（師）（帥）有三十六（萬）（方），皆著黃巾，同日反叛。安平、甘陵人各執其王以應之。

三月戊申，以河南尹何進爲大將軍，將兵屯都亭。置八關都尉官。壬子，大赦天下黨人，還諸徙者，唯張角不赦。詔公、卿出馬、弩，舉列將子孫及吏民有明戰陣之略者，詣公車。遣北中郎將盧植討張角，左中郎將皇甫嵩、右中郎將朱儁討潁川黃巾。庚子，南陽黃巾張曼成攻殺郡守褚貢。

夏四月，太尉楊賜免，太僕弘農鄧盛爲太尉。司空張濟罷，大司農張溫爲司空。朱儁爲黃巾波才所敗。侍中向栩、張鈞坐言宦者，下獄死。汝南黃巾敗太守趙謙於邵陵。廣陽黃巾殺幽州刺史郭勳及太守劉衛。

五月，皇甫嵩、朱儁復與波才等戰於長社，大破之。

六月，南陽太守秦頡擊張曼成，斬之。交趾屯兵執刺史及合浦太守來達，自稱『柱天將軍』，遣交趾刺史賈琮討平之。皇甫嵩、朱儁大破汝南黃巾於西華。詔嵩討東郡，朱儁討南陽。盧植破黃巾，圍張角於廣宗。宦官誣奏植，抵罪。遣中郎將董卓攻張角，不尅。洛陽女子生兒，兩頭

共身。

秋七月，巴郡妖巫張脩反，寇郡縣。河南尹徐灌下獄死。

八月，皇甫嵩與黃巾戰於倉亭，獲其帥。乙巳，詔皇甫嵩北討張角。

九月，安平王續有罪誅，國除。

冬十月，皇甫嵩與黃巾賊戰於廣宗，獲張角弟梁。角先死，乃戮其屍。以皇甫嵩爲左車騎將軍。

十一月，皇甫嵩又破黃巾于下曲陽，斬張角弟寶。湟中義從胡北宮伯玉與先零羌叛，以金城人邊章、韓遂爲軍帥，攻殺護羌校尉儉、金城太守陳懿。癸巳，朱儁拔宛城，斬黃巾別帥孫夏。詔減太官珍羞，御食一肉；廐馬非郊祭之用，悉出給軍。

十二月己巳，大赦天下，改元中平。

是歲，下邳王意薨，無子，國除。郡國生異草，備龍蛇鳥獸之形。

二年春正月，大疫。琅邪王據薨。

二月己酉，南宮大災，火半月乃滅。（己）〔癸〕亥，廣陽門外屋自壞。稅天下田，畝十錢。黑

山賊張牛角等十餘輩並起，所在寇鈔。司徒袁隗免。

三月，廷尉崔烈爲司徒。北宮伯玉等寇三輔，遣左車騎將軍皇甫嵩討之，不尅。

夏四月庚戌，大風，雨雹。

五月，太尉鄧盛罷，太僕河〔南〕〔內〕張延爲太尉。

秋七月，三輔螟。左車騎將軍皇甫嵩免。

八月，以司空張溫爲車騎將軍，討北宮伯玉。

九月，特進楊賜爲司空。

冬十月庚寅，司空楊賜薨，光祿大夫許相爲司空。前司徒陳耽、諫議大夫劉陶坐直言，下獄死。

十一月，張溫破北宮伯玉於美陽，因遣盪寇將軍周慎追擊之，圍榆中。又遣中郎將董卓討先零羌。慎、卓並不克。鮮卑寇幽、并二州。

是歲，造萬金堂於西園。洛陽民生兒，兩頭四臂。

三年春二月，江夏兵趙慈反，殺南陽太守秦頡。庚戌，大赦天下。太尉張延罷，車騎將軍張